

इवनिंग डोगरी न्यूज़ बुलेटिन

समे .18:15 Hrs

## Headlines

- उपराज्यपाल मनोज सिन्हा होरें उधमपुर च राश्ट्रीय जरनैली शिडक दी बहाली आहले कम्मै दा जायजा लैता। उनें जम्मू च हाडें करी प्रभावित परौआरें लेई लाए गेदे सेहत शिविरें दा दौरा लाया।
- उपराज्यपाल ते मुखमंत्रि होरें कुलगाम च सुरक्षाबलें ते आतंकवादिएं बश्कार होए दे टाकरे दरान शहीद सैन्य कर्मिं गी श्रद्धांजलि भेंट कीती।
- मुख सचिव अटल डुल्लू होरें ई.एस.डब्ल्यू सचिव हुंदे कन्नै साबका फौजिं दे कल्याण सरबंधी हीलें पर चर्चा कीती।
- पुंछ जिले च जमीन धस्सने करी कई सारे ढांचें गी नुकसान पुज्जा।
- जम्मू-कश्मीर च बद्दल घनोए दे रौहने ते हल्की बरखा बरने दी मेद ऐ। जम्मू-श्रीनगर राश्ट्रीय जरनैली शिडक गड्डिं दी आओजाई लेई लगातार 8में रोज बी बंदा मेद ऐ जे एह शिडक चिरें संझा हल्की गड्डिं लेई खोल्ली दिती जाग।

<><><><><><>

## LG-NH Restoration

उपराज्यपाल मनोज सिन्हा होरें अज्ज उधमपुर दे थरडद्य ग्रांS दा दौरा कीता ते जम्मू-श्रीनगर राश्ट्रीय जरनैली शिडक एन.एच-44 पर जारी मरम्मत आहले कम्में दा जायजा लैता। इस मौके पर एल.जी होरें गी एनएचएआई दे मकामी अधिकारी आर.एस यादव होरें हाइवे पर गड्डियें दी आओजाई बहाल करने लेई जारी मरम्मत आहले कम्में दे अलावा अमले ते मशीनरी बारै बी जानकारी दिती। उनें दस्सेआ जे टीम लगातार कम्म करा'रदी ऐ ते इक बक्खी दा गड्डियें दी आओजाई बहाल करने लेई तौले गै खोली दिता जाग। इस दरान एल.जी होरें जखैनी च गुज्जर-बकरवाल होस्टल च सेहत मैहकमे आसेआ लोआए गेदे कैंप च बी शिरकत कीती। एहदे शा पैहले

उपराज्यपाल होरें जम्मू च राजीव कालोनी च हाडें कन्नै प्रभावित परोआरें लेई लोआए गेदे शिविर दा दौरा कीता ते सब्भनें प्रभावित परोआरें दी परेशानियें गी बी सुनेआ।

<><><><><><>

### LG/CM Tributes

उपराज्यपाल मनोज सिन्हा होरें कुलगाम च होए दे टाकरे दरान शहीद होए दे सेना दे 2 जवानें गी श्रद्धांजलि दिती ते आखेआ जे उंदे शौर्य दे अदम्य साहस गी म्हेशा चेत्ता रक्खेआ जाग। एल.जी होरें सौहृगी परोआरें कन्नै अपनी संवेदना बी प्रगट कीतियां। उनें आखेआ जे दुखै दी इस घडी च पूरा देश उन्दे कन्नै खडोते दा ऐ। मुखमंत्री उमर अब्दुल्ला होरें कुलगाम जिले च आतंकवादियें कन्नै छिडे दे इक टाकरे च शहीद होए दे द'ऊ बहादुर सैनिकें गी अज्ज श्रद्धांजलि भेंट कीती। इस मौके उनें शहीदें दे उन्दे पार्थिव शवें पर फुल्लें दे चक्र चाढे ते आक्खेया जे शहीदें दी दलेरी ते बलिदान गी सदा चेता रक्खेया जाग

<><><><><><>

### CS-ESW

मुख सचिव अटल डुल्लू होरें रक्षा मंत्रालय च साबका सैनिक कल्याण सचिव डॉ. नितिन चंद्रा हुंदे कन्नै गल्लबात कीती ते जम्मू-कश्मीर च साबका फौजियें दे कल्याण लेई योजनाएं गी लागू करने सरबन्धी मसलें पर तफसीली विचार-विमर्श कीता। चर्चा दरान साबका फौजियें दी भलाई-बेहतरी दे कन्नोकन्नी रिटायर होने मगरा होरनें मौकें दी उपलब्धता बारै बी गल्लबात होई। इन्दे च व्यापक डेटाबेस किट्टा करियै उंदा डिजिटलीकरण् ते सेवा आहले अखीरले ब'रे दरान सरकारी नौकरियें च साबका सैनिक कोटा दे तैहत आवेदनें गी इजाजत देने दा प्रावधान बी शामिल ऐ।

<><><><><><>

### GST-Reforms

सरकार आसेआ वस्तु ते सेवा कर दी दरें च कटौती बारै हाल च सरकार आसेआ कीती गेदी घोषणा दा सभ्बनें सौआगत कीता ऐ। इस फैसले दा जम्मू-कश्मीर दे बसनीकें ते कारोबारिएं बी सौआगत कीता ऐ। अज्ज अस घर ते निर्माण खेत्तर च कीती गेदी कटौती दी गल्लू करगे। निर्माण कम्में च लग्गने आहले समेयान जियां सीमेंट पर पैहले

28 फीसद जीएसटी लग्गदा हा, ते हुन एह्दे पर 18 फीसद टैक्स लग्गोग। मार्बल, ग्रेनाइट ब्लाक बगैरा सस्ते होए ना। इन्दे पर 5 फीसद कर लग्गोग। आकाशवाणी समाचार कन्नै गल्ल करदे होई जम्मू चेंबर ऑफ कामर्स दे साबका प्रधान जुगल महाजन होरें आखेआ।

<><><><><><>

### Programme-Announcement

सेवा सप्ताह 2025 दे तैहत आयोजित बक्ख-बक्ख कार्यक्रमें ते गतिविधियें दे इक हिस्से दे तौरा पर आकाशवाणी दा क्षेत्रीय समाचार एकांश जम्मू, कल यानि 10 सितम्बर गी इक वशेष परिचर्चा प्रसारत करने जा'रदा ऐ-जेहदा विषय सार ऐ- "निग्गर आर्थिक सुधारें राएं विकास गी बढ़ावा।" इस कार्जक्रम च स्हाड़े महमान होगंन- मन्ने-परमन्ने दे अर्थशास्त्री ते जम्मू युनिवर्सिटी च इकोनॉमिक्स दे जम्मू प्रोफैसर दिपांकर सेनगुप्त- जेहड़े इस विषय दे बक्ख-बक्ख पैहलुएं पर लौ पागंन। उन्दे कन्नै गल्लबात करगंन जगमोहन शर्मा ते कुणाल श्रीवत्स। 30एं मिन्टे दा एह कार्यक्रम अतरु बुधवारे दिने साड्डे 12 बजे प्रसारत कीता जाहगा। जिसी तुस स्हाड़ी FM फ्रिक्वेंसी 100 इशारिया 3 मैगाहर्ट्स ते कन्नै मीडियम वेव 303 मीटर यानि 990 Khz पर बी सुनी सकदे ओ।

<><><><><><>

### Land-Sinking

पुंछ जिले दे इक ग्रांस च जमीन धस्सने करी तकरीबन 30 ढांचे गी नुकसान पुज्जा ऐ जेदे च रिहायशी घर ते 2 सरकारी स्कूल बी शामिल ना। आकाशवाणी जम्मू संवाददाता दी रिपोर्ट मूजब जिले दे मेंढर सब डिविजन दे कालाबन ग्रांस च जमीन धस्सने करी नुकसान होआ ऐ। इस इलाके गी लगातार बरखें करी नुकसान होआ ऐ। इस इलाके गी लगातार बरखें करी नुकसान होआ ऐ। जमीन धस्सने करी लोकें च डर-त्राह आहला माहौल ऐ। कई सारे लोकें गी उत्थुआं सुरक्षित थाहरें पर पजाई दिता गेआ ऐ। मेंढर दे सब डिविजनल मैजिस्ट्रेट इमरान कटारिया होरें आखेआ जे अजें तगर 30 घरें, 2 सरकारी स्कूलें, इक मसीत गी नुकसान पुज्जा ऐ।

<><><><><><>

## VD-Yatra Suspended

श्री माता वैष्णो देवी जी दी जात्तरा लगातार 15में रोज बी बंद ऐ। एह जात्तरा थाहरें-थाहरें ल्हास-पस्सियां पौने ते भारी बरखें करी बंद ऐ। उआं अज्ज मौसम च सुधार दिक्खेआ गेआ ऐ। जात्तरा दा रस्ता पूरी चाल्ली साफ होने, यात्रिएं दी सुरक्षा गी यकीनी बनाने मगरा गै जात्तरा गी परतिए शुरू करने बारै फैसला कीता जाग। ज्हारां बद्दे श्रद्धालुएं जिनें इस पवित्तर श्राइन च जाने दी योजना बनाई दी ऐ, ओह जात्तरा आहले रस्ते गी खुल्लने गी बलगा'रदे ना। मेद ऐ जे तौले गै एह जात्तरा शुरू होई जाग।

<><><><><><>

## Weather-NHW

मौसम विभाग नै केंद्र शासित प्रदेश च औने आहले दिनें दरान कई सारी थाहरें पर हल्की बरखा ते गरज-चमक दी पेशगोई कीती ऐ। अज्जै थवां 12 दिसतंबर तगर आमतौर पर मौसम गर्म ते उमर आहला रौह्ग। किश थाहरें उआं मौसम विभाग नै 13 सितंबर थमां हल्की थमां दरम्याने दर्जे दी बरखा ते गरज-चमक दी पेशगोई कीती ऐ। इस बारै होर जानकारी स्हाडे संवाददाता थमां।

तोआई, जम्मू-श्रीनगर राश्ट्रीय जरनैली शिड़क अज्ज लगातार 8में रोज गड्डियें दी आओजाई लेई बंद ऐ। शिड़क गी बहाल करने दा कम्म जारी ऐ। एनएचएआई रिजनल अफसर आर.एस यादव होरें आखेआ जे मेद ऐ जे एह शिड़क हल्की गड्डियें लेई तौले गै खोली दिती जा। उनें आखेआ।

<><><><><><>

## Ramban-PM

रामबन जिले च मैहकमा राई-बाई आसेआ प्रधानमंत्री फसल बीमा योजना तैहत कुदरती करोपियें कन्नै फसलें गी पुज्जे दे नुकसान दा मुआवजा देने लेई लगातार कम्म कीता जा'रदा ऐ। करसानें गी खरीफ ते तिलहन आहली फसलें लेई 2 फीसद दा बद्दोबद्द प्रीमियम देना होग जिसलै के रबी आहली फसलें लेई डेढ प्रतिशत ते नकदी ते

बागवानी आहली फसलें लेई बद्दोबद्द 5 फीसद प्रीमियम देना होगा। एहदे च राई-बाई लेई नमियें तकनीकें दे इस्तेमाल पर बी जोर पाया गेआ ऐ। इस बारै जानकारी दिंदे होई मुख राई-बाई अधिकारी रामबन विनय कुमार जंडियाल होरें आखेआ।

<><><><><><>

## PTC-Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां ना। इच्छुक आवेदक जेहदी उमर 24 थमां 50 बरें दे बश्कार ऐ ते ओह जम्मू जिले दा रौहने आहला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रेजुएशन ते पत्रकारिता च 2 बरें दा तजुर्बा होना लोडचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोडचदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोडचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 14 September 2025 संजा 6 बजे कोला पैहले- पैहले आइए दस्ती जमा करोआनी होगा। इस बारै व्यापक जानकारी आकाशवाणी दी वेबसाइट [www.newsonair.gov.in](http://www.newsonair.gov.in) पर उपलब्ध ऐ।

<><><><><><>